

# **SCHLIERBACHER KERBSPRUCH 2000**

Hallo Schlierbach, Schoffem, Langscht un Klescht,  
gegrüßt seid ihr uff unserm Fest.

Un all ihr Leit aus Nah und Fern,  
von de ganze Welt, mir houn eisch gern.

Seid gegrüßt hier in unserm Zelt,  
mit hoffe, das eich de Kerbspruch gefällt.

Mir hawe wieder gesammelt viele Sache,  
manche zum greune, manche zum lache.

Doch loßt eisch beim Esse und Tringe nit unnerbresche,  
wenn mir hier sou rischdich uff die Pauke dresche.

Die Feierwehr hat disjohr die Kerb iwernumme,  
un mir hoffe, daß mir noch recht viel Bier bekomme.

Unser Schlierbach, des is zwar nit grouß,  
doch is bei uns immer was lous.

Was mir fer Theme houn, werd ihr jetzt hern,  
un wens betrifft, soll sich dodrou nid stehrn.

Es werd nid weiter rumgeschwätzt,  
mir fange an,  
jetzt werd üwwer die Schlierbacher Begeweheide gehetzt.

1.)

Die Gemeinde hat sich dis Johr was gedocht,  
un hat was fer die Ortsverschönerung gemocht.

Sie baute e Schild direkt vors Ort,  
fer alle Leit von weiter Fort.

Des begrüsst die aus de Verne,  
in Schoffem, Moschbach, Raare und Schlierbach recht gerne.

Allerdings wor de größte Platz,  
nadirlich fer den Scheffemer Satz.

Oaner hat des schnell kapiert,  
un hat den Fehler korrigiert.

Jetzt steit do uff dem Ding,  
"Willkommen in Schlierbach", geschriebe mit Edding.

E ganz anner Schild wurd ach geännert,  
dem Ortsschild soi Possition wurd verännert.

Sie kame an mit em Kran,  
und stellte des Schild neher an Schoffem dran.

Wenn des sou weiter geit,  
wisst ihr wou des Schild dann im nächste Johr steit?

Do werd´s ganz noch Schoffem dirigiert,  
dann ham mer die nämlich anektiert.

**Moral:**

Un die Moral von der Geschicht,  
Liebst du die Ort, änner die Schilder nicht!!!

2.)

Glöckner wurd er früher genannt,  
un wor ach schon immer bei de Feuerwehr bekannt.

Bei de Feuerwehr is er immer noch mit aller guten Dinge,  
un dut do ach gern emol oan dringe.

An em Donnerstag dut´s wieder gut laafe,  
do muss er am nächste mojend nadirlich lang schlafe.

Soi Fraa geit dann mojend´s zum Metzjer denn sie is schon fit,  
doch nimmt se halt koan Schlissel mit.

Dohoam vor´m Haus fange die Probleme erst an,  
wou is dann blous ihr´n Mann.

Koaner macht uff wenn mer dut ruffe,  
is der dann immernoch besoffe?

Lebt der noch, vielleicht schläft der ach,  
jetzt mach ich halt mol richtig grach.

Die Nachbern kumme dann ach bal herbei,  
es kann ja soi dass er wacht uff glei.

Doch schlieslich kimmt dann dene ihr´n Sohn aus Schoffem an,  
un dem soin Junior krabbelt dann emol uff de Balkon.

Er kloppt e bissche am Fenster,  
do wacht der alte Glöckner uff, un denckt er sieht gespenster.

Egal wor des dann ewer ach,  
hauptsache de Kerl wor wach.

### **Lied:**

Und die Kappelle spielt hierzu la-le-lu!!!

3.)

Och was is die Erwet sou schwehr,  
ich glab ich gei zur Bundeswehr.

Des dacht sich oaner aus unserm Ort,  
un eilt glei zur Kaserne fort.

Un weil mer dehoam doch mol was schaafe muss,  
gerät de Kerl ganz in verdruss.

Er muss soi Harley reparieren,  
do muss halt ach die Freundin nach seine Anweisung parieren.

Er setzt se uff de Bulldock,  
un macht ihr dobei richtich druck.

Dann verlädt er die Maschin,  
un gibt denn Befehl nach Schoffem hin.

Bei dem Befehl is die Freundin weggerannt,  
deshalb wird de Nachbar zum Fohrn eigesponnt.

De Schofsbecker fährt zur Werkstatt mit Macht,  
unsern Soldat sichert die Fracht.

Er hat Angst das soi Harley kippt,  
deshalb is er uff de Tank gehippt.

Er sichert in bester Rockermanier,  
un brummt dabei wie e Tier.

### **Moral:**

Bei de Bundeswehr ham se sou e Werkstatt nit,  
do nimmt oam halt de Schofbecker mit!!!

4.)

De Bodybilder aus Schlierbach wor mit soine Kollesche unerwechs,  
schnell in de Abbelbaum geht´s.

Kaum sin se dann dort oigetrotte,  
ham se erstmol poor gesoffe.

Die Nacht die ging ach schnell erum,  
de nächste mojud wor noch jung,  
do sin se aus de Disco naus,  
un ham sich gefrocht, wie kumme mir nach Haus?

Die Idee wor groß,  
mir rufe de Bodybilders-Vater ou un sin die Soie los.

Schnell em Taxi entgeie gegange,  
ham se uff de Verkehrsinsel gestanne.

De Owend wor schei un durft nit vergei,  
do wollt mer halt e poor Souvenir´n mit losse gei.

Es oane Schild mitgenumme,es annere verboche,  
mer konnt ja fasst denke die Kerle wern uff Droche.

De Vadder kam wor sehr entsetzt,  
un is dann mit dene Buwe hoam gehetzt.

De hoam ougekumme, er musst zwar nit breche,  
doch wollt sich de Bu mim Schil unner´m Orm ins Bett noi Leche.

Dabei hat er gemacht dann sehr viel Krach,  
bis schließlich wor es ganze Haus dann wach.

De Bu denkt sich dann des nächste Bett is glei gemocht,  
es wot zwar des von de Schwester des hot er nit bedocht.

Bis dann de Vadder mol hat e Machtwort gesproche,  
un de Bu is in soi Bett gekroche.

**Moral:**

Un die Moral von der Geschicht,  
Muskel un Alkohol vertrache sich nicht

5.)

Die Silvesterfeier wor en volle erfolg in Schlierbach,  
Gott sei dank gab´s ach koan krach,  
die Leit ham gefeiert wie die wilde,  
des bast nadirlich ins Schlierbacher Bilde.

Manche ham gedantz bis frieh am Mojend in de Bar,  
bei sehr schene Lieder wie z.B. Lambada.

Oaner hat do nit lon nochgedacht,  
un hat sich halt glei naggisch gemacht.

Er hat sich ausgezoche-sogor die Unnerhose,  
bei de Fraue wor die Begeisterung groß.

Er dantzte so noch lange Zeit,  
bis er wor dann richtich breit.

Er ging dann Hoam im schnelle schritt,  
-HALT Hermann vergess doi Klammotte nit.

**Lied:**

Zieh dich aus kleine Maus.....

6.)

Die Fußballer hatte Trainingslager,  
aber sportlich wor es ziemlich mager.

Denn sie ham die ganze Nacht gesuffe,  
vielleicht hatte se vor'm Trainingsspiel muffe.

Des Spiel wor ach net sou de Hit,  
awer zum Friehschoppe worn se wieder all Fit.

Doch des grouse erwache,  
gab's beim Trikot sauwer mache.

Sie ham die Trikot's zum wesche gegewwe,  
doch oans des wor e bisje denewwe.

In a Hos hot oaner noigeschisse,  
un nadirlich hot's ach gestunge noch Pisse.

Es hot alsou oaner in die Hose geschisse,  
hoffentlich hot der jetzt e schlecht gewisse.

**Moral:**

Die Schlierbacher Fussballer spiele zwar nit schee,  
doch sie doun recht gern in die Kneipe geh.

7.)

Düsseldorf is e Stadt,  
in der des Dream Team freude hat.

Damit ach jeder tringe kann,  
fährt mer mit de Deutsche Bahn.

Des Bier hot nur bis Mainz gelangt,  
dann sin se glei an die nächst Thek geschwankt.

Die Stimmung wor gut es wurd viel gesunge,  
der Lärm is bis noch Schlierabch gedrunge.

Damit es dehoam ach koan verwirrt,  
wird mit em Handy telefoniert.

De Shorty vom Bersch,  
wor ihr´n Handy-Zwersch.

Noch oaner durchzechten Nocht,  
wurd sich uff de Hoamweg gemacht.

Doch unnerwechs, was en schreck,  
dem SHORTY soi Handy des wor weg.

De Hoamwech wurd brisant,  
denn koaner hat de rischdische Zuch erkannt.

Sie drehte in Frankfort noch e Ehrenrund,  
es dauert iwwer e Stund.

Sie hawwe dann doch de rischdische Zuch zur Endstation genumme,  
doch oun Handy ham se koa Taxi bekomme.

**Moral:**

Verlierst de mol doi korz Antenne,  
musst de uff em Bohnhouf penne.



8.)

Wenn mers im Bett net bleibe lasse kann,  
muß mer halt ons Heisje ran.

Nach 5 Jahr war die Not sehr groß,  
denn ihm juckt´s ständig in de Hos´

Jetzt is Schluß hat er sich gedocht,  
jetzt werd das Heisje greiser gemocht.

Jetzt werd´s Dach runner gehowe,  
uf den Platz, wo mer jetzt of de Kerb rundowe.

A poor Bitte Speiß brauche mer jetzt,  
dass uns die Stoh net von de Mauer fetzt.

Danach hamse sich bestellt en Autokrahn,  
der hebt das Dach nuff mit Elan.

Doch der Elan, der war zu groß,  
das Dach trete sich im Wind famos.

Jetzt hamse a groußes Problem,  
wie se das Dach wieder richtig rundrehn.

Von Süd nach West, von Ost nach Nord,  
jetzt drehn se des Dach an de richtige Ort.

Es warn ka richtische Palette do,  
da hamse sich was zamme genachelt, das geit ach so.

Doch der Gedanke war verkehrt,  
damit hamse sich die Ziechel zerstört.

Kurz vorm Ziel, mer glaabt es kaum,  
riß die Palette und flog uf de Zaun.

Damit die Aweide weiter gei kenne,  
müßese erst ma a paar Ziechel bestelle.

Die Ziechel worn do, die Aweit ging weiter,  
jetzt is de Bauherr widder heiter.

**Lied:** Auf und Nieder immer wieder!!!!

9.)

Donnerstags uf em Sportplatz, des is für manche Leut net gut,  
die Saufe sich zu bis unner de Hut.

Wenn er dann ham geit, mit a bisje Brass,  
denkt er sich jetzt mach ich daham die Bude a bisje nass.

Uffs Klo getaumelt, die Dür grad erreicht,  
da konnt ers net mer hale, das Ding muß jetzt wern leicht.

Doch da gabs noch a Problem,  
er hatte uffeinmal 3 Klos do stehn.

Er hat zu viel Schnaps gesoffe  
und hat alle 3 net getroffe.

De Tochter drückts jetzt ach im Po,  
do mußse nadürlich ach uffs Klo.

Sie merkte de Boden war ziemlich feucht,  
und ruft die Mudder, die ihn dann scheuscht.

Die Mudder guckt sich des Drama an,  
und ruft de Vadder, Vadder du muß dran.

De Tommy wußt gar net wies ehm geschied,  
und putzt drauf los bis er nix mehr sieht.

**Lied:** Saufen ..... Fressen und pinkeln!!!!

10.)

E Ehepaar aus Schlierbach ging zur Blutspende  
drum nahm die Mallorca-Party danach ein schrecklichess Ende.

Beide gaben richtig Gas  
und lerte so manches Glas.

In de Ache von der Fraa sah man nur noch des weise  
und sie fing an in die Teke zu beise

Heimlaufen war nid mehr drin  
da kam se in a Audo rin

Die Fahrt die machte ga koan spass  
am Ende war´n die Polster nass.

Es soll zwar kanner wisse  
ewer es war ka Wasser sondern Pisse

Beim Frühstück war der Schrecken grouß  
wo ist mein Gatte blouß

Der Kurze vom Berg hat en entdeckt  
un ist debei tierisch erschreckt.

De Kurze hats Sportlerheim ufgeschlosse  
da stand er vor ihm ohne bosse

Das der eingespert wor, des hat den nid gestert  
er hat dan weil a mal im Sportlermein gekehrt

Er hats nid mehr gepackt nach Haus  
drum streckt er sich in de Sportlerkabine aus

**Lied:**

Alkohol ist der Sanitäter in der Not

11.)

Letzt Johr wor ihr'n Mann im Kerbspruch droi,  
dis Johr wollt die Könischin selbst enoi.

Sie is dehoam un will schnell fort,  
do fährt se de Chrysler fasst zu schrott.

Es Houfdoor wollt se naus sou schnell wie's geit,  
doch hot se nit geseie das es Houfdoor halb uff nur steit.

Sie steit dann do un werd ganz blass,  
ei des Auto steit ja halb im Houf un halb uff de Gas.

Sie gugt nochmol richtig, do sieht se es Houfdoor uff ihr'm Auto hänge,  
jetzt was se ach wouher des laute penge.

Sie is erst traurich, doch dann greischt se „Jetzt git's e nei Houfdoor,  
des hatte mer schon seit fünft Johr vor.“

De Otto steit neue drou un denkt,  
jetzt hot die des Houfdoor uffgehängt.

Des gitt's doch nit des kann doch nit soi,  
do stecke doch souviel erinnereunge droi.

**Lied:**

Markus-ich will spaß.....ja mein Chrysler fährt 210....

Mir hoffe, es is ougekumme,  
und wurde nid als Beleidigung uffgenumme.

Es wor als Spaß Eisch vorgebracht,  
wo man darüber tüchtg lacht.

Wenn nix basiert bei uns im Ort,  
verliere mir im Kerbspruch dadrüber ko Wort.

Ach iwvern Mini Kurt nit - mir down en all kenne,  
ach der dout sich anschoint ab jetzt benemme.

Benemmt Eisch bis zum nexte Johr,  
donn gits koan Kerbspruch des is klor.

Sollt aner vergesse worn soi,  
der kimmt halt nextes Johr in de Kerbspruch noi.

Un nun wünsche mer Eisch noch scheene Tage,  
Tanze, Singe, was fern Mache.

Seit fröhlich un genießt eier Lewe,  
loßt uns dodruf jetzt oaner Hewe.

Wem is die Kerb?	-Unser
Vom Nabel bis zum?	-Brunser
Un der is ach noch?	-Unser
Wann feiern mir Kerb?	-Alle Johr
Wie wird die Kerb?	-Klor
Was soi mer?	-Lumbe
Was rache mer?	-Stumbe
Was saufe mer?	-Humbe
Die Schlierbacher Kerb sie lebe	-Hoch
Un nochemol	-Hoch
Un nochemol	-Hoch